

# Vischnaunca Andiaſt



**Lescha da taglia  
dalla vischnaunca  
d'Andiaſt**

# Lescha da taglia dalla vischnaunca d'Andiast

## INTRODUCZIUN

### Artechel 1

#### *Specias da taglia*

Sin fundament d'artechel 48 dalla constituziun dalla vischnaunca d'Andiast diils 20 da mars 1981 impona quella las suandontas taglias:

1. A persunas naturalas
  - a) ina taglia sin entrada e sin facultad
  - b) ina taglia sin gudogn fatgs culla vendita da schischom
2. A persunas giuridicas
  - a) ina taglia sin schischom
  - b) ina taglia sin scumiada da maun
3. A persunas naturalas, giuridicas ed a tuttas autras cuminonzas da persunas
  - a) ina taglia sin ierta
  - b) ina taglia sin donaziuns (schenghetg)
  - c) ina taglia sin tgauns

### Artechel 2

#### *Resalva da taglias internaziunalas, intercantunalas ed intercomunales*

En cass da relaziuns internaziunalas, intercantunalas ed intercomunales ei il concernent dretg federal e cantunal reservaus.

La suprastonza communal secunvegn cun autras vischnauncas el senn dallas normas davart la taglia dubla.

### Artechel 3

#### *Prescripziuns surordinarias*

Prescriba questa lescha nuot auter, vegnan las vertentas determinaziuns corrispudentas dil dretg cantunal applicadas. Oravontut valan era las prescripziuns cantunalas concernent las taglias posteriuras e las taglias da castitgs disciplinars.

# PART I

## Dretg material

### A Taglias

#### Artechel 4

##### *Taglia sin entrada e facultad*

Las taglias sin entrada e sin facultad vegnan adossadas en procents dalla taglia cantunala semplia da medema specia.

Il pei da taglia vegn fixaus entras la radunonza communal. Midadas dil pei da taglia per ina nova perioda ein da concluder mintgamai entochen la fin da december.

#### Artechel 5

##### *Taglia sin gudogn da vendita da schischom*

La taglia sin gudogn fatgs culla vendita da schischom senormescha tenor la taglia cantunala da medema specia e vegn fixada cun 100 % da quella per la vischnaunca.

#### Artechel 6

##### *Taglia sin schischom*

1. La taglia sin schischom ei da pagar mintg'onn per schischom sin territori dalla vischnaunca d'Andiast.
2. Sco schischom valan:
  - a) Ils beins schischents (CCS art 655 cef. 1)
  - b) Dretgs inscrets el register funsil, che han ina atgna e stabla existencia (CCS art. 779 e 780)
  - c) Las minieras
  - d) Ils dretgs da cumpropietad vid beins schischents (CCS art. 646 e 712 ss)

Tiel schischom audan era tuttas pertinenzas sco indrezs, intallaziuns e. a. v. ch'ein colligiadas fermamein e permanentamein cul terren.

#### Artechel 7

##### *Subject da taglia*

Alla taglia sin schischom ein suttamessas tuttas personas naturalas e giuridicas ch'ein proprietarias ni gudidras dil schischom alla fin digl onn da taglia.

## Artechel 8

**Deliberaziun dalla taglia** Dalla taglia sin schischom ein deliberai:

- a) Corporaziuns ed instituziuns publicas, sco era uniuns e fundaziuns privatas che stattan el survetsch da vischnaunca, cumin, cantun u confederaziun, ni che adempleschan exclusivamein pensums culturals.
- b) Las duas baselgias ufficialas dil cantun per schischom che survescha directamein ad intents ecclesiastics.

## Artechel 9

**Altezia dalla taglia sin schischom**

La taglia sin schischom munta ad 1.3 ‰ dalla valeta dalla facultad suttamessa alla taglia cantunala alla fin digl onn da taglia, denton senza subtracziun dils deivets.

## Artechel 10

**Taglia sin scumiada da maun**

Per schischom el senn d'art. 6 sin territori d'Andiast che mida proprietari impona la vischnaunca ina taglia sin scumiada da maun da 2 % dalla summa da cumpra ni en cass da disproporziun dalla valeta ufficiala da commerci.

A quella taglia ein medemamein suttamessas las parts da dretgs vid corporaziuns el senn d'art. 46 al. 1. dalla lescha introductiva tiel CCS, sco era las concessiuns e dretgs d'aua.

Parts vid proprietad da cuminonza da schischom valan sco parts da schischom.

Per brats vegn la survaleta suttamessa alla taglia sin scumiada da maun.

## Artechel 11

**Scumiada da maun**

Per scumiada da maun vala scadina midada da proprietad e scadina cessiun dalla pussonza efectiva ed economica da disponer dil schischom.

Per midada da maun economica valan oravontut:

- a) Exequir il dretg da substituziun ord in contract da cumpra ni contract cul dretg da cumpra.
- b) La cessiun da participaziuns vid societads immobilieras, sch'igl acquistader persuls ni ensemen cun siu(a) consort(a) ni ses affons ni en outra maniera survegn varga la mesadad dil capital fundamental ni da tschèp ni dils dretgs da vuschar.
- c) Engraviar schischom encunter indemnisaziun cun servituds dil dretg privat ni cun restrincziuns da proprietad dil dretg public, schilunsch che quellas restrenschan la cultivaziun ni la valeta da vender per adina ed essenzialmein.

Negina scumiada da maun munta la midada da proprietad da cuminonza en cumproprietad e la procedura cuntraria, priu che las parts dils autorisai d'entochen ussa vegnien buca midadas. Il medem vala per l'incorporaziun da schischom en ina societad collectiva ni da commandit.

### **Artechel 12**

**Scumiada da maun  
libras da taglia**

Deliberai dalla taglia sin scumiada da maun ein:

- a) Scumiadas da maun muort successiun d'ierta, partiziun d'ierta, testament e preretschevida d'ierta.
- b) Scumiadas da maun denter geniturs ed affons respectiv denter sirs e siras e schienders e brits.
- c) Scumiadas da maun muort cunvegnientschas e disposiziuns appartenent il stan dils beins matrimonials, sco era autras scumiadas da maun denter consorts.
- d) Scumiadas da maun per motivs dalla megliuraziun da funs, dall'arrundaziun da funs, dalla planisaziun da quartier, dalla revisiun da cunfins ni da regroupgament da terren da baghegiar.
- e) Scumiadas da maun muort expropriaziuns ni cessiun da libra veglia da schischom, per il qual ei exista in dretg d'expropriaziun.
- f) Scumiadas da maun ella procedura da stumadira e da moratori giudizial, el cass ch'igl acquist d'in bein schiscent entras il credit dil pègn, il garant dil pègn ni il debitur solidaric meina ed ina sperdita.

### **Artechel 13**

**Scumiadas da maun  
libras da taglia**

Las personas numnadas egl art. 8 per il schischom leu enumeraus.

### **Artechel 14**

**Object dalla taglia**

Igl acquistader dil schischom ei suttamess all'obligaziun dalla taglia sin scumiada da maun. Autras cunvegnientschas denter las parts ein resalvadas.

Stat il schischom en proprietad d'ina societad collectiva ni da commandit, sch'ei la societad suttamessa alla taglia.

Tier cumproprietad ni tier proprietad da cuminonza ei scadin participont suttamess alla taglia a proporziun da sia part.

### **Artechel 15**

**Schischom agricol**

Vegn schischom agricol acquistaus entras personas autorisadas per la precumpra el senn dalla legislaziun davart il manteniment dils beins purils, vala il prezi legal da surprida per prezi da cumpra.

## Artechel 16

### *Taglia sin ierta*

Alla taglia sin ierta ei mintga successiun d'ierta e tuts objects suttames, ch'eiin suttaposts alla taglia cantunala sin relasch, sch'il testader haveva el mument da sia mort domicil ad Andiastr. Per schischom sil territori dalla vischnaunca d'Andiastr ei la taglia d'ierta era da pagar, sch'il testader haveva buca siu domicil en vischnaunca.

La valeta dalla facultad da relasch vegn eruida secund las respectivas prescripziuns cantunalas.

Exista la contribuziun denton en ina gudida ni en ina prestaziun che serepeta, ei lur valeta capitalisada decisiva per l'obligaziun da taglia sil relasch.

## Artechel 17

### *Object da taglia*

L'obligaziun da pagar la taglia sin ierta ha il retschevider dalla facultad da relasch.

## Artechel 18

### *Deliberaziun da taglia*

Las personas numnadas en art. 8 ein deliberadas dalla taglia sin ierta.

La deliberaziun cumpeglia tuts objects dalla facultad. Prescripziuns specialas en cunvegrientscha da cunterdretg ein reslvadas.

Ha il defunct giu negin domicil, sche vala sia dimora permanenta en vischnaunca era per la taglia sin ierta.

## Artechel 19

### *Subtracziuns*

Preveda il dretg cantunal summas libras da taglia ni subtracziuns valan quellas medemamein per la vischnaunca.

## Artechel 20

### *Altezia dalla taglia sin ierta*

La taglia sin ierta munta a:

- a) 0 % per parents dalla lingia ascendenta e descendenta, affons nutri e per ils consort survivent.
- b) 4 % per parents ord lingia diils geniturs
- c) 7 % per parents ord lingia da tat e tatta
- d) 10 % per parents ord lingia da basat e basatta
- e) 15 % per tuts auters parents ed artavels

Artavels secundars pagan la taglia tenor lur relaziun da parentella visavi gl'empren defunct.

## **Artechel 21**

### ***Incassament da garanzia***

Per la retratga dalla taglia sin ierta e per la garanzia digl incassament da quella vala per la vischnaunca art. 115 dalla lescha da taglia cantunala.

## **Artechel 22**

### ***Taglia sin donaziuns***

Per la taglia sin donaziuns valan las medemas prescripziuns sco il cantun ha per quellas taglias (art. 116 – 121 lescha cantunala da taglia).

## **Artechel 23**

### ***Taglia sin tgauns***

Per mintga tgaun sur 3 meins, tenius sin territori dalla vischnaunca d'Andiast, eis ei da pagar ina taglia annunala da CHF 50.00 e per mintga ulteriur tgaun el medem tenercasa CHF 100.00 (senza la taglia da tgauns dil cumin).

La taglia sin tgauns vegn quintada mo per onns entirs. Obligaus da pagar la taglia ei quel che tegn il tgaun.

## **Artechel 24**

### ***Deliberaziun dalla taglia sin tgauns***

Tgauns da polizia, da lavinias e da tschocs pagan negina taglia.

## **B Taxas**

### **Artechel 25**

#### ***Specias***

Sin fundament da reglements specials inacassescha la vischnaunca:

- a) taxas da canalisaziun
- b) ina taxa per dismetter rumians
- c) ina taxa annuala per lubientscha d'ustria
- d) taxas per il gudiment da pastiras, alps e pasculaziun cumina
- e) taxas per lavur cumina
- f) taxas da lenna
- g) taxas per conceder distanzas scursanidas da cunfin encunter terren da vischnaunca
- h) taxas per lubientschas da baghegiar
- i) ina taxa da cura
- j) taxas per carar sin vias da funs
- k) taxas per plazs da parcadi
- l) taxas per gudiment da terren public

## PART II

### Dretg formal

#### Artechel 26

*Organs da taglia,  
suprastonza communal*

La suprastonza communal survigliescha l'applicaziun da questa lescha da taglia. Ella taxescha e communichescha las taglias e las taglias supplementaras. Ella decida en emprema istanza davart taglias da castitg e fallonzas sco era davart damondas da reponderaziun, da moratoris, da relaschada e da levgiament da taglia.

#### Artechel 27

*Instanza da protesta*

La suprastonza communal decida davart tuttas protestas eucunter taxaziuns che cumpetan en sia cumpetenza.

#### Artechel 28

*Taxaziun da taglia*

Las taxaziuns e las decisiuns cantunales vegnan per ordinari surpridas per las taglias communalas.

Il pei da taglia sin entrada e facultad resta denton resalvaus.

#### Artechel 29

*Taxaziun autonoma*

La vischnaunca taxescha da maniera autonoma:

- a) Las taglias e taglias supplementaras, las taglias da castitg, las fallonzas e taxas ch'ella impona persula sin fundament da questa lescha.
- b) Sch'ina persuna vegn suttamessa danovamein mo all'obligaziun da taglia communal, denton buca a quella dil cantun ni vegn relaschada mo da lezza.
- c) Sch'ina repartiziun intercommunal ei neccessaria.

La procedura sedrezza tenor il dretg cantunal.

#### Artechel 30

*Fuorma dalla dispo-  
siziun da taxaziun*

La disposiziun da taxaziun ei da comunicar al pagataglia en scret cun l'indicaziun dils mieds legals.

Cun la comunicaziun ein las differenzas tier la declaronza da taglia mintgamai d'indicar e da commentar.

### **Artechel 31**

#### ***Communicaziun***

Ils quens da taglia communalas ein da tarmetter als pagataglias ensemen cul quen da taxas 90 dis avon il termin da pagament.

Dallas taglias communalas che vegnan taxadas ed incassadas dall'-administraziun da taglia cantunala fa la vischnaunca valer sia part.

En tuts auters cass vegn la taxaziun fatga sil pli tard enteifer sis meins dapi ch'il fatg che motivescha la taglia exista ed ei vegn tschentau quen persunter enteifer quei termin.

### **Artechel 32**

#### ***Mieds legals da protesta***

Encunter disposiziuns da taxaziun definitivs san ins far protesta en scret tier la instancia da taxaziun enteifer 30 dis dapi la communicaziun.

La protesta sto cuntener ina proposta ed ina motivaziun e sto vegnir suttascretta.

### **Artechel 33**

#### ***Recuors***

Encunter tuttas decisiuns dalla davosa instancia san ins recuorer enteifer 20 dis dapi la communicaziun alla dertgira administrativa dil cantun.

### **Artechel 34**

#### ***Reponderaziun***

Ina disposiziun da taxaziun en vigur sa vegnir reponderada, sch'ils motifs da reponderaziun previ dil dretg cantunal ein avon maun. Termins e procedura sedrezzan tenor il dretg cantunal.

### **Artechel 35**

#### ***Incasso da taglias, scadenza***

Las taglias, las fallonzas da taglia e las taxas scadan cun la communicaziun dil quein provisoric ni definitiv ni dalla disposiziun da taxaziun provisorica ni definitiva fatga a maniera autonoma dalla vischnaunca.

### **Artechel 36**

#### ***Termin da pagar***

Las taglias e taxas communalas messa a quen 90 dis avon tenor art. 31 ein da pagar entochen ils 30 da settember dil medem onn.

La ulteriuras taglias e taxas ein da pagar enteifer 30 dis dapi la vigur da lur scadenza.

Tgi che banduna la vischnaunca ha da pagar sias taglias e taxas avon la partenza. Cun l'avertura dil concuors ei mintga taglia e taxa da pagar immediat.

### **Artechel 37**

***Tscheins retardai e  
tscheins da bunificaziun***

Per las pretensiuns da taglia che vegnan buca pagadas enteifer ils termins fixai, vegn quintau in tscheins retardau. Quella prescripziun vala era pil pagament da summas da taglia taxadas mo provisoricamein. Sch'igl ei vegniu pagau memia bia taglia, sch'ei la summa surpagada da restituir cun in tscheins da bunificaziun. Tscheins retardau e tscheins da bunificaziun corrispundan allas tarifas dil cantun.

### **Artechel 38**

***Moratori, relaschada***

Las prescripziuns cantunales appartenent moratori e la relaschada da taglias ein d'applicar conform al senn.

Decisiuns da moratori e relaschada davart taglias da vischnaunca decida la commissiun da taglia.

### **Artechel 39**

***Passada en vigur  
dretg abrogau***

Questa lescha ei vegnida acceptada dalla radunonza generala dils 30 da november 2001. Ella passa en vigur cun l'approbaziun dalla regenza. En quei mument vegnan tuttas prescripziuns dalla vischnaunca d'Andiast cassadas che cunterfan a questa lescha.

**Il president communal:**

.....  
Roland Vincenz

**Igl actuar:**

.....  
Giovanni Damiano